

- केन्द्रीय ग्रामीण विकास मंत्री शिवराज सिंह चौहान कह्यो-वीबी जी रामजी रा तैत किंण ई राज्य रा बजट प्रस्ताव मांय कोई कटौती नी करी ज्यी।
- केन्द्रीय शिक्षा मंत्री धर्मेन्द्र प्रधान 21 जून ने ओजू ली जावण वाळी नीट यू.जी. परीक्षा री तैयारियां रो जायजो लीनो।
- राज्य सरकार बीकानेर रा पी.बी.एम. अस्पताल मांय जापा वाळी लुगाइयां री तबियत बिगड़बा रा मामला मांय रपट मांगी।
- देश ऊं दिसावर मांय बिक्री लारला 12 साल मांय 468 अरब डॉलर ऊं बध र 863 अरब डॉलर ताई पूग्यी।

000

मनरेगा योजना ऊं विकसित भारत-रोजगार गारंटी अर आजीविका मिशन ग्रामीण-वीबी-जी-रामजी मांय बदलाव सारू केन्द्र सरकार राज्यां अर केंद्र रा राज वाळा प्रदेशां सारू 95 हजार 692 करोड़ रुपया रा अंतरिम बजट रो प्रस्ताव कीनो है। केन्द्रीय ग्रामीण विकास मंत्री शिवराज सिंह चौहान नई दिल्ली मांय राज्यां अर केन्द्र रा राज वाळा प्रदेशां रा ग्रामीण विकास मंत्रियां सागे वर्चुअल मीटिंग मांय ओ ऐलाण कीनो। ई पाछे खबरनवीसां सागे बातचीत करता थकां श्री चौहान कह्यो के किंण ई राज्य रा बजट आवंटन मांय कोई कमी नी करी ज्यी है, बल्कि लारला साल री तुलना मांय बजट 40 फीसदी बधायी ज्यो है।

000

ओ कानून 1 जुलाई ऊं आखा देश मांय लागू व्हे जावेला।

000

केन्द्रीय शिक्षामंत्री धर्मेन्द्र प्रधान आज राष्ट्रीय परीक्षा एजेंसी-एनटीए रा मुख्यालय रो दौरा कर र 21 जून ने ओजू ली जावण वाळी नीट यू.जी. प्रवेश परीक्षा री तैयारियां रो जायजो लीनो। खबरनवीसां सागे बातचीत करता थकां वे कह्यो के परीक्षा साफगोई सागे करावण अर इण री गोपनीयता बणायी राखण सारू सगळा जरूरी जतन कर्या जा रह्या है। शिक्षा मंत्री कह्यो के ई दौरान आवण वाळी अडचनां रो सामो करण सारू खुफिया तंत्र अर केन्द्रीय जांच ब्यूरो समेत सगळा साइबर सुरक्षा संसाधन काम लिया जा रह्या है।

000

जयपुर रा खो-नागोरियान हलका मांय पटाखा बणावण रा एक कारखाना मांय लाय लाग जावण ऊं तीन मजूरान री मौत व्हे ग्यी अर पांच मजूर घणा दाज ग्या। जखमी मजूरान ने जयपुर सवाईमानसिंह अस्पताल मांय भर्ती करायी ज्यो है। रिहायशी हलका मांय गैर-कानूनी तौर ऊं चाल रह्या ई कारखाना मांय हादसा री बगत महिलावां अर बच्चां समेत आठ जणां मौजूद हा। लाय लाग्यां पाछे वठे राख्यी ज्यी गैस री टंकी ई फाट ग्यी। हादसा री जाणकारी मिलता ई सिविल डिफेंस री टीम मौके पूगी अर दमकल री मदद ऊं आग बुझाई ज्यी। थानाधिकारी ओमप्रकाश बतायो के लाय लागण रा कारणों री जांच करी जा रही है।

000

प्रदेश ऊं राज्यसभा री तीन सीटां माथे चुणाव सारू उम्मीदवारां कानी ऊं दाखिल करी ज्यो सगळा नौ नामपाना आज विधनसभा मांय करी ज्यी जांच मांय सही मिल्या है। द्विवार्षिक चुणाव सारू राज्य ऊं तीन उम्मीदवार पर्वा दाखिल कीना हा। आं मांय दो भाजपा रा अर 1 कांग्रेस रो उम्मीदवार है। चुणाव अहलकार भारत भूषण शर्मा बतायो के 3 उम्मीदवार कांग्रेस रा नीरज डांगी अर भाजपा रा डॉ. अलका सिंह अर डॉ. सतीश पूनिया रा पर्वा री

जांच पर्यवेक्षक अर मुख्य निर्वाचन अधिकारी नवीन महाजन री मौजूदगी मांय करायी ज्यी। जांच रा काम रो वीडियो ई बनायी ज्यो। नाम पाछा लेवण री काल आखिरी तारीख है।

000

राज्यपाल हरिभाऊ बागडे कह्यो है के जूना जमाना ऊं ई भारत भणार्ई—लिखाई रो केन्द्र रह्यो। वे आज लोकभवन मांय कर्नाटक मांय धारवाड़ रा इण्डियन इंस्टीट्यूट ऑफ इंफोर्मेशन टेक्नोलॉजी रा विद्यार्थियां सागे मुलाकात रे दौरान बोल रह्या हा। एक भारत—श्रेष्ठ भारत रा तैत विद्यार्थियां सागे मुलाकात रे दौरान राज्यपाल राजस्थान रा महापुरुषां अर ऐतिहासिक स्मारकां रो जिकर ई कीनो। नुवी शिक्षा नीति रो जिकरो करता थकां श्री बागडे कह्यो के इण मांय नौजवानां ने हर हलका मांय अगाड़ी बनावण माथे जोर दियो ज्यो है।

000

मुख्यमंत्री भजनलाल शर्मा आज भरतपुर अर डीग जिलां रा आला अहलकारां सागे मीटिंग कर र वठै विकास रा कामां रा बारा मांय चर्चा कीनी अर जरूरी हुकम दीना। मुख्यमंत्री डीग जिला रा श्रीनाथजी मंदिर मांय जातरूआं सागे ई बातचीत कीनी अर सुबीतां रा बारा मांय जाणकारी लीनी। ई दौरान गृहराज्य मंत्री जवाहर सिंह बेढम अर राजस्थान धरोहर प्रोन्नति प्राधिकरण रा अध्यक्ष ओंकार सिंह लखावत ई मौजूद हा।

000

बीकानेर रा पी.बी.एम. सफाखाना मांय ऑपरेशन ऊं व्ह्या जापा पाछे छह लुगाइयां री तबियत खराब व्हे जावण रा मामला मांय चिकित्सा विभाग मेडिकल कॉलेज रा प्रिंसिपल ऊं रपट मांगी है। ई सागे ई जोधपुर मेडिकल कॉलेज ऊं ई जाणकारां री टीम जांच सारू बीकानेर भेजी ज्यी है। ई बीचे चिकित्सा मंत्री गजेंद्र सिंह खींवसर आज जयपुर मांय अहलकारां सागे मीटिंग कर र मामला री जाणकारी लीनी अर ऐडा वाकया रोकण सारू सगळा जरूरी जतन करण बाबत् कह्यो। खबरनवीसां सागे बातचीत करता थकां खींवसर कह्यो के बीकानेर रो ओ मामलो कोटा मांय लारला दिनां व्ह्या मामला सरीखो नी है।

000

ध्यानजोग है के बीकानेर मांय ऑपरेशन ऊं व्ह्या जापा पाछे 6 लुगाइयां री किडनी माथे असर पड़बा री जाणकारी मिली है, जदके घणी मांदी एक लुगाई ने वेंटिलेटर माथे राख्यी ज्यी है।

000

चित्तौड़गढ़ मांय राष्ट्रीय वयोश्री योजना रा तैत आज बुजुर्गां ने जिन्दगी आसान बनावण मांय मददगार साज—ओ—सामान दिया ज्यो। सामाजिक न्याय अर अधिकारिता मंत्री अविनाश गहलोत 800 ऊं बत्ता बुजुर्गां ने अ उपकरण दीना। वे बतायो के ई सारू लारला साल नवम्बर महीना मांय खास शिविर लगा र पात्र लोगां री पिछाण करी ज्यी, ज्यीं पाछे वां री जरूरत रे मुताबिक 85 लाख रुप्या मोल रा उपकरण तैयार करायी ज्यो।

000

भारत रा सामान री दिसावर मांय बिक्री लारला 12 साल मांय 468 अरब डॉलर ऊं बध र 863 अरब डॉलर तांई पूग ग्यी है। वाणिज्य अर उद्योग मंत्रालय रा वाणिज्य विभाग मांय संयुक्त सचिव साकेत कुमार आज जयपुर मांय आ जाणकारी दीनी। केंद्र मांय एनडीए रा राज रा बारह साल पूरा व्हेवण रा सिलसिला मांय राख्यी ज्यी कार्यशाला मांय श्री कुमार कह्यो के ई मियाद मांय सेवा हलका ऊं जुडी बिक्री मांय 9 फीसदी ऊं बत्ती बधोतरी दर्ज करी ज्यी। श्री कुमार न्यारा—न्यारा देशां सागे करी ज्यो मुक्त व्यापार करार ऊं उपजी नुवी संभावनावां रा बारा मांय ई जाणकारी दीनी। वे कह्यो के इण ऊं भारत ऊं दिसावर मांय सेवा अर माल बेचण वाळां ने बेहतर मौका मिल रह्या है।

000

सरकारी ई-मार्केटप्लेस-जेम रे जरिए खरीद-बिक्री करण वाळा सूक्ष्म अर लघु उद्यमां री तादाद साल 2016-17 रा करीब 2 हजार 300 ऊं बध र अब 12 लाख व्हे गयी है। जेम रा मुख्य कार्यकारी अधिकारी मिहिर कुमार आज नई दिल्ली मांय खबरनवीसां ने आ जाणकारी दीनी। वे कहयो के जेम माथे महिलावां रा मालिकाना हक वाळा उद्यमां री तादाद ई बध र अब 2 लाख 16 हजार ने पार कर गयी है अर महिला उद्यमियां कानी ऊं खरीदी ई 93 हजार करोड़ रुपया रा लेवल ने पार कर गयी है।

000

प्रदेश मांय तेज गर्मी अर उमस रो असर बध गयो है। आज श्रीगंगानगर, बीकानेर अर जैसलमेर समेत केई ठौड़ां पारो 44 डिग्री सेल्सियस ने पार कर गयो। बाड़मेर, चूरु, कोटा, जोधपुर अर जयपुर मांय ई जोरदार गर्मी रही। ई बीचे मौसम विभाग आज प्रदेश रा सात जिलां मांय अंधड़-बरसात अर पांच जिलां मांय लू बाजण सारु चेतायो है। 11 जून ऊं राज्य रा केई हलकां मांय ओजू आंधी-बारिश व्हेवण रा आसार है।

000

अहमदाबाद मांय राखी ज्यी पहली विश्व योगासन चैंपियनशिप मांय राजस्थान पुलिस री सिपाही देवांशी शर्मा सीनियर-बी हैंड बैलेंस होड़ री व्यक्तिगत श्रेणी मांय सोना रो तमगो हासिल कीनो है। राज्यपाल हरिभाऊ बागड़े वां ने आ उपलब्धि हासिल करण सारु बधाई अर शुभकामनावां दीनी है। राज्यपाल वां रा बधाई संदेश मांय ई होड़ ने भारत री संस्कृति ऊं जुड़्या योग खेलां ने दुनिया री स्वीकृति बतायी।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 28 जून ने विचार बतावेला। आ ई कार्यक्रम री 135वीं कड़ी व्हेला। ई सारु आप ई मुफ्त नम्बर 1800-11-7800 माथे 26 जून तांई राय दे सको हो। नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000